

Il cussegl naziunal giavischa in scumond da burcas

L'iniziativa parlamentara cumpiglia in scumond general da cuvrir la fatscha

■ (sda/anr) **Da purtar ina burca duai esser scumandà en Svizra. Il cussegl naziunal ha approvà cun in resultat fil filà in'iniziativa parlamentara. Quella pretenda in scumond da purtar vel sin l'intschess public. Che quai chattia accoglientescha en il cussegl dals chantuns è da dubitar.** La cumissiun da la chombra pitschna era s'exprimida l'entschatta da quest onn cun diesch cunter ina vusch e duas abstenziuns cleramain encunter in tal scumond. Persunas che portian in vel ord motivs religius inscuntrian ins darar en Svizra e na muntian perquai betg propi in problem, ha la cumissiun argumentà. D'in scumond fissan pertutgadas oravant tut turistas da pajais islamics e quai pudess avair consequenzas negativas per il turissem.

Sinaquai ha era la cumissiun dal cussegl naziunal midà opiniun, s'enter ch'ins aveva l'emprim acceptà l'iniziativa. I na dettia nagins motivs da segirezza che pledian per l'iniziativa, ha ditg *Kurt Fhuri* (pld/SO) en num da la cumissiun. Plinavant saja vegnida lantschada en il fratemp er in'iniziativa populara, la dumonda possia vegnir sclerida ensem en lezza.

Betg mo burcas fissan scumandadas

Quest'argumentaziun n'ha betg persvadi il cussegl naziunal ch'è suandà ina proposta da minoritad ed ha beneventà l'iniziativa cun 88 cunter 87 vuschs e diesch abstenziuns. Uschia sto uss il cussegl dals chantuns sa fatschentar cun la chaussa.

Entant che la sanestra ha votà serradamain encunter il scumond da burcas ha la pps votà per l'intervenziun da ses collega da partida. Damain decis èn stadas las partidas dal center. Ils cussegliers da la pcd han per gronda part sustegnì l'iniziativa parlamentara, ils commembers da la pld èn – cun paucas excepziuns – s'exprimids encunter.

Il sa cuvrir cumpletamain stettia en stretg connex cun l'islam radical, ha explitgà *Walter Wobmann* (pps/SO) las raschuns per sia iniziativa. Sch'insatgi sa cuvria na possian ins en temps dal terrorissem dal SI betg pli fastizar sch'ina persuna saja da buna fai u violenta, portia armas u betg. Tuttina intenda Wobmann in scumond betg mo

da burcas, mabain in scumond general da cuvrir la fatscha. «En noss intschess cultural mussan ins la fatscha.»

Bunas schanzas a l'urna

Sin stgalim naziunal rimnan ins da preschent suttascripziuns per l'iniziativa populara «gea ad in scumond da cuvrir la fatscha». Ils iniziants dal «Egerkinger Komitee» enturn Wobmann han temp en fin ils 15 da settember 2017 da rabagliar ensem las 100 000 suttascripziuns necessarias.

Las schanzas èn bunas. Sch'in scumond da burcas vegniss oz a l'urna schessan radund 60 pertschient dals votants gea. Quai sorta dad ina enquista represchentativa che la «Schweiz am Sonntag» ha publitgà dacurt.